

羅江縣志卷七

邑人李調元雨村稿

北鄉中

雲龍山北象山有李石亭公別墅名曰醒園額爲丹徒編修王文治書

李化楠山居卽事詩四首有序云買地十畝築室三楹避俗離塵風景擅平泉之勝背山臨水烟霞繪輞川之圖手栽竹木漸成林樂哉斯土自是園廬多逸興老矣歸田散步獨遊曲折檻欄花爛熳憑高遠眺迷離村樹屋參差旣適志以安身亦陶情而悅性年

羅江縣志

卷七

一

華易逝那有仙藥駐紅顏富貴何時肯對靈山辭綵  
蟻本來面目醉裡乾坤僻地無鄰嶺上白雲常在戶  
高峯有主天邊明月不須錢登東臯以舒懷橐筆成  
韻倚北窻而寄傲薤簞生涼謂我何求只向林園尋  
活計於心已足不勞蓬島問因緣爰作小詩以質同  
好 何處堪宜着此身園林幽僻絕囂塵鋤荒結就  
三間屋便與烟霞作主人 山居非吏亦非仙喜得  
名花盡日妍酒罷長吟無一事望江亭下水連天  
牽衣直上七層臺眼底乾坤大放開林樹蒼茫村舍  
遠白雲深處有人來 看看兩鬢白如絲角利貪名

到幾時願得人皆閒似我常來共對一枰棋

石亭詩

園中有大石缸養金魚十餘尾缸面坐小石山山上栽花木數種蒼翠可愛缸上有石亭公石刻詩

山一卷天半落水一勺長不涸上承綠樹陰下見紅鱗躍春色滿園林亭臺隨地着吾心淡無營吾身欣有托何須海外覓三山此間便是蓬萊閣

醒園圖重慶太守漢軍朱孝純子穎所畫也朱初爲珙縣令道出羅江曾遊此園後同年編修海寧祝德麟芷塘復以庚寅借檢討湖南鄧文泮入蜀典試回京路過羅江縣志卷七二見訪留詩次年予至京補官與朱祝相晤各憶舊遊子穎遂爲繪圖祝首題詠寄回醒園懸石壁間以後題者甚衆

庚寅四川正主考編修祝德麟題醒園圖詩并序云歲庚寅奉使入蜀時主人偃臥醒園子穎方守重慶試事畢迂道訪舊流連竟夕沙竹之勝魚鳥之樂得周覽焉主人送至金山驛而別途中用工部韻作十律寄之高下幽曠之趣摹寫畧盡越二載主人來京師子穎亦以改守山東待觀闕下別筵作畫遠形近勢如在目前醒園僻在遐陬以主人之賢凡名流入

蜀者莫不至其地至必有詩子穎亦親見者故寫景  
獨真而松風水月僅付臥遊豈所謂寓意于物而不  
留意者耶余既幸斯園之得主復不免今昔之感錄  
前詩歸之宿醒園用杜工部遊何將軍山林韻十首  
園枕山面流到時天已曠待曉登絕頂騁眺遂  
聯轡過南邨登堂拜母而別故備志蹤跡焉 跡滯

三秋後身遊萬里橋黃花明異域青鳥返重霄短李

幽居僻長須突騎招逢迎欣得主造訪肯辭遙 滅

從聯雙騎天光出郭清溪喧惟祭獺秋老不聞鶯野

爰除瓜架山妻茹菜羹殷勤語楚客何似武陵行鄧

山謂所歷徑途  
絕似楚南邨景林外波聲活潺江別一支叱牛收水

羅江縣志 卷七

三

磨呼鴨上陂池徑亂增樵惑巒重獨鳥知只應游屐

過荆棘已教披 漸近醒園路山寒少雜花插天峯

似象赴壑水如虵鱗鬣看松老梧捲想澤賒他年長

千尺喬木識君家園依雲龍山為址其旁曰象山李  
氏祠墓所在繞舍萬松皆尊甫所

植柴荆無洒掃今日逐江開堂構方求木雨村方謀  
與築承先

志也寒暄異望梅榻懸徐孺至黍具范卿來為問門前

路容誰損綠苔 握手讀詩集高詞源湧泉思親新

涕淚懷友舊纏綿唱和聯諸謝評詩待老錢兩邨向  
學詩于

前香樹為  
翁所極賞凋零雙桂後若箇長西川楊升菴雙桂堂  
在新都今已廢

飲我郭筒酒春醪麴米香庖烟衝暝黑園菜益津涼

選忘兒能誦杯乾婦久藏乘醺思振策下界鬱蒼蒼

熹微尋石磴曲徑半臨池真欲謀笈簪偶來到接羅  
人家團竹色秋水瘦魚兒早識溪山美應令畫手隨

雪嶺明晴旭花驄撥亂雲碑前重墮淚身後但遺

文經其尊甫祠堂

拜母衣冠肅論交輩行分

令弟鼎元於是科獲為故戲之

童時釣遊處指點復紛紛 一飯南村舍臨岐意若

何別人甘語少看客比鄰多敢忘對床約難為行路  
歌回頭問野老使節幾經過壬辰重陽後三日

調元和憶昨金山驛銷魂似霸橋獨歸聽夜雨相望  
隔雲霄仍對烏犍侶難為白鶴招今宵燈送喜萬里

羅江縣志

卷七

四

素書遙

開緘鯨掉尾瘦字逼波清已列班中鷺猶

思谷口鷺交寧甘似醴詩却和於美此夕渾忘寐持  
吟徹曉行 疴抱年來久逢迎總強支原非揚子宅

誰問習家池鋤草憐蟲訴移花許蝶知自經君染翰  
景色競紛披 三秋纔謝菊二月又飛花忽漫逢江

雁因嗟赴壑蛇十詩寧易得千盞不難賒天意憐孤  
寂風吹過我家 人到晨星後天教積霧開諸昆非

軾轍座主是歐梅一夕成佳話千秋此偶來但看攜  
手處三徑未生苔 留客斟清聖烹茶瀉碧泉更長

眠未穩語短意殊綿香漬雲垂紙燈明夜博錢顛狂

聲不細一日遍三川 高軒來過處草木有清香衣  
帶巴江暈牀分楚簟涼詩緣聽雨作書借看雲藏尚  
喜顏皆舊毋須歎老蒼 吾家潺水曲柴屋正臨池  
天使回旄節主人方接羅擁門窺野客送榼遣諸兒  
却悔分張日車塵失計隨 並馬送君去清江水蹙  
雲山川供別賦風雨助論文棧閣程空望綿州路早  
分當時腸最斷歸緒淚紛紛 寫罷鸞牋寄茫茫奈  
若何劍南鴻字少輦下故人多難忘青燈伴慙賡白  
雪歌至今明月夜猶夢使星過

順天府府尹南滙吳省欽君才美如蜀錦段過歸奉

羅江縣志

卷七

五

寢淹三年墓田丙舍計粗就來枕畫省香爐烟雲龍  
山旁象山麓潺江東遠鳴濺濺小園雖小衍先澤漁  
父信宿時黃綠一樓一閣置帖安一花一藥羅芳鮮  
亦知人情重懷土猶驚鶴怨終由天笑磬生絹乞能  
手朱老真似南鄰然古來行軍著要約馬廐往往摧  
平泉卽今松維事撻伐輸輓例藉租庸錢君爲蜀人  
朱蜀守時蠟兩屐張長筵想見雪嶺戍天外千里貼  
席忘戈鋌予於是園欠親歷巖居川觀寧非仙掉頭  
不住入京洛山水之福將唐捐賴此畫本秘行篋玉  
蟾蜍淚流微涓醒園獨醒太無賴豈若買醉長安眠

橙林他日大於斗過訪我亦浮巴船

刑部郎中桐城姚鼐蜀山西自蠻夷之中來千仞萬  
仞雪崔巍劍門山南錦江暖桑麻沃野當中開綿州  
縮轂劍關口白沙碧水環杉柳吏部平生居此州萬  
株種松百瓶酒錄詩空谷感英靈投轄使驛招賓友  
天下傳君此醒園君今却出劍關門我見君顏長不  
澤君道思家歸未得况復西山有畔夷軍興大渡河  
西北蒲氏山密豺狼驕又傳兵馬乘繩橋丁男盡力  
助輸輓園林坐見生蓬蒿前夕渝州使君至看山徧  
歷印驪地籌邊經國意何長就君傳出西南事爲君水

羅江縣志

卷七

竹貌平分先貌松維雪嶺雲偃卧信知魚鳥樂明年  
定罷殿前軍

侍讀學士青陽王懿修卜築新堂綠野如芙蓉溪畔  
謫仙居家聲試朔平泉記手澤猶存種樹書長愛清  
閒對琴鶴未訪磊落注蟲魚名園自是迴翔地辛苦  
貽謀慶有餘 仙才未合住岩阿數畝園如傳舍過  
宦跡共瞻星使遠文心應貯錦囊多春風海外新桃  
李素業山中舊薜蘿此日堂陰真濟美胡良遙接潞

河波

潁州府知

章信有之使君圖

畫翰林詩必逢

名園醒亦宜花木

泉亭千里夢墜芙蓉

山亦有烟霞癖猿

鶴同君怨別離

編修歙縣程晉芳重慶太守能詩復善畫昨來與予  
剪燈話乘閒乘雪會上峩嵒最高頂俯矚大千銀世  
界嶺無平勢澗無聲凍雀冷雲爲一派凌虛抗手欲  
招真不信人間多芥蒂談神說鬼無此瑰且奇使我  
聆之起衰憊因覽其近詩蕭瑟空濛具得山水力醉  
後拈毫繪醒園乃是雨村所促逼雖經促逼饒遠神  
羅江亦有峩嵒春斜亭曲沼歸方幅瀉入平江月一

羅江縣志

卷七

七

輪依巖作屏植木如錦丙舍柔柔熟丹甚清泉白石  
自惺惺暢好於中圖快飲奚以獨醒爲自命狂特甚  
霜猿叫更寒噤痒墮葉鏗鏗警秋枕皇然遽然炊未  
飪斯境可稱無上之上品太守懷蜀子憶家眼中筆  
底開烟霞此時蓉溪芙蓉白於玉問君何苦留京華  
離門盡被松遮却空際描摹難捉摸後人讀畫羨遭  
逢詩家流爲詩家作

戶部主事會稽吳璜禮林籠竹夾空垣中有臨江舊  
業存彷彿翠屏過細雨荷鋤閑立聽吟猿翰林奉  
使詩曾和太守來遊畫擅長好貫輅筒多酌我當筵

一效次公狂

翰林院庶吉士德清陳墉羅江山水清且妍浮空一  
碧通雲烟雲龍之峯勢竦立俯瞰衆壑如隨肩芙蓉  
溪水環其前清光似練涵長川羣巒倒影落明鏡恍  
睹玉女高鬟懸兩村卜居蒼翠間登臨縱目千山連  
拳帷暮掩西嶺月把酒曉挹峩嶩天搗來催程赴日  
下山靈應笑奔塵綠草堂風色定不改特乞好手圖  
林泉輕風縈江天漠漠微雲入樹山娟娟林亭石室  
互虧蔽畫中彷彿桃源仙京師八月秋氣鮮高槐雜  
樹鳴涼蟬明窻晝靜拂絹素對之如泛書畫船我思

羅江縣志

卷七

八

茲園歷已久前人作室基開先當時經營手澤在詩  
篇幾處曾題鐫龍門晉謁今幾年古杭風月吳山偏  
墓田旋見生宿草西望蜀道悲啼鵲安得驅車來古  
綿相從鄴架披遺編興來更着上山屐高巖一枕松  
風眠

調元題醒園圖有感六首車家山下老農夫走上長  
安十二衢昨夜鄉愁眠不得呼燈起看醒園圖自分  
途窮命裏該君平不必太驚猜虎頭不是封侯相欸  
段他時歸去來每到花開躑躅頻故山不見與誰春  
生憎一幅桃源畫付與漁郎去問津再向天涯理客



衣回頭三十九年非蓉溪春色花如錦不爲蓴鱸也  
合歸煩惱詩人二月天長安買醉日高眠不須怪我  
朝參懶夢裏醒園只枕邊故山茅屋傍雲龍欲寄新  
詩再拆封寄語兒童牆角外明年添種幾株松

醒園梨樹最多青黃二種約二百株皆先君手植

調元梨園遺興二首笑對青山曲未終倚樓閒看打  
魚翁歸來只在梨園坐看破繁華總是空生涯酷似  
李崆峒投老閒居杜鄴中習氣未除身尚健自敲檀  
板課歌僮

石刻

天然牀大如廣廈璽瓏剔透擅一園之勝卽先君石亭

羅江縣志

卷七

九

公箭亭所坐牀也臨江露置風日無損遊者皆登焉

調元詩序云天然牀古栢根也昔先君應羅江令楊  
古華聘請修奎星閣取材於東山有栢高二千尺大  
四十圍霜皮溜雨不知爲何代物中梓人選因伐之  
以其身爲棟而棄其根爲薪先君惜之謂古華曰此  
可斲爲牀也遂欣然送之掘及九仞乃得備百夫撐  
之溯江昇至醒園除其沙礫剝之剔之稍加修飾椳  
枅蟠結百竅璽瓏盡作龍鳳龜蛇之狀截而平其頂  
登之能容八人可坐可眠有若生成故曰天然牀其  
廣一間屋不能容故置於箭道以茹亭覆之率爲風

雨所拔然根堅於鐵故雖風日亦不能剝蝕也因於  
臨江安置作歌以記之云綿州奎閣齊雲霞建者楊  
侯字古華當時伐木十選一兩川斫盡仍三巴就中  
先子實首事古栢輪困半封記忽與楊侯登東山黛  
色參天互驚視細者爲楠大者宋乃惜其根乞作牀  
自從撐至醒園後夜夜玉衡星有光斲成縱橫皆一  
丈龍鳳龜蛇形各像大牙相錯虬文蟠畧加修飾非  
由匠不須簣第不須茵磨洗瑩如楚簞勻涼天若徙  
北窓卧清風定認羲皇人我聞牀以栢爲貴素栢蹙  
栢皆稱異何況人棄我取之資費無多豈非瑞所怪

羅江縣志

卷七

十

直局脚微分釘爭金鐵前朝聞莫教又夢玉堂去夜  
中催撰牀婆文嗟余須髮雖未皓歸來宦興跡如埽  
安得此牀化黃楊高枕吾廬睡無蚤琉璃瑤猶不  
題况又萊杞與管蔡惟此先人手澤在堪與青蓮七  
寶齊不願跣趺不願坐但願醉來此間卧不妨露頂  
看青天一任浮雲太虛過

由醒園左手而下卽康家壩也縣北三十里有觀音巖  
調元觀音巖重修大殿記觀音巖本名白石巖在北  
鄉三十里之康家壩前此未有觀音之名也乾隆辛  
酉秋驟雨淋漓山崩石裂雷轟電擊忽從霹靂光中

而觀音石像出焉是月先君石亭公卽中鄉試三十  
六名附近居隣皆以爲神遂以名巖遠近禱者有求  
輒應以是通都大邑輻輳而來而每逢二月十九日  
爲觀音誕辰乞靈報賽者畢聚此日爲之酌神演劇  
其會之大幾與二月初三七曲山梓潼會等蓋綿州  
之第一禪林也顧巖逼巨石峭壁插天建殿不易從  
前開山和尚祥喜嵌巖建置大殿添設東廊閱旣久  
飛瓦墮落殿頗損壞今年七月天雨連綿山水陡發  
巖爲崩裂遂將大殿壓倒兩間而東廊亦傾圮其半  
道姑趙復坤念無以安神居也爲之惻然思重修之

羅江縣志

卷七

十一

更建玉皇樓於三層之上而力薄不逮不無望於十  
方之施主爲之請序於余以倡之余思觀音之神起  
於南海顯於西蜀化七十又二之身無不曾照遍三  
千有奇之國共荷慈悲而獨顯靈於吾土此尤居民  
之太幸也求福者神無不報之矣而顧使神居不妥  
可乎乾隆五十二年冬月上浣記

調元遊觀音巖何年霹靂擊鐵壁混沌乾坤忽中裂  
風雨號呼山爲搖普陀飛賜一靈石從此文運吾家  
開聯翩三鳳齊飛來天荒畢竟須天破五丁終不如  
五雷

鵲鶴寺縣北二十五里余舊讀書處

調元試畢復歸鵲鶴寺詩歸山重掃舊書床一路寒  
山木葉黃游浙有師皆老宿歸川無試不高庠滿窓

已見蛛懸網翻盎先看鼠自忙一秀才回詩亦貴吟

箋纔寫有人藏

補歲考例附三等時亦附高等  
學臺有三年始見一秀才之語

金頂山縣北二十八里頂有古松元明間物也

李化楠詠金頂古松詩天上何人下碧霄千年怪叟  
在山腰雲爲翠蓋身全露風撼蒼枝影不搖老鍊龍  
鱗經歲月長揮塵尾絕塵囂幾回佇立江干望滿耳

秋濤早晚潮

羅江縣志

卷七

十三

調元雨中望金頂山詩一山孤立衆仙宗盤繞青螺  
萬萬重雲裏長疑披絮帽雨中偏似着輕容人言海  
內無三島我道村中第一峯倚得孤松喚金頂問他  
可也受秦封

馮家紫月峯山縣北三十里有文昌宮人稱上梓潼以  
南村爲中梓潼團堆爲下梓潼相去俱七八里每年二  
月初三文昌誕日三處並賽士女奔覩焉

李化楠重修月峯梓潼宮碑記馮家紫有山日月峯  
在羅江縣北三十里雙巒特出峭壁嶙峋攝衣而上  
登其巔則河村南村之烟戶歷歷可數焉蓋一邑文

風所薈萃也上有文昌宮爲士子瞻拜之所創造不知何時明末兵亂委於灰燼有志者議修之不果康熙壬午庠生范延湄刈草爲菴讀書其中慨聖靈之未妥文教之未光乃與明經陳君獻三招募衆財莊巖聖像兼修樂樓一座迄於今數十年矣風雨漂搖木朽蠹生加以乞兒輩盤踞於中日散夜聚或拆毀墻壁或污穢殿庭以致愈加荒涼陳君目擊心惻以爲坐觀其敗罪將有歸爰倡首刻日鳩工重修去其朽腐易以良材又於正殿旁接修偏房二所前修拜亭三楹亭下砌石爲臺中置一門懸於巖畔以時啟

閉擇醇良者鑰之遂煥然爲兩村之冠焉是役也始自庚午冬越辛未夏不一年而成其間之募衆捐貲者固多而陳氏之父子祖孫宣力爲尤多帝君之靈從此其永安矣而今而後將使兩村之人以時瞻拜入門生敬追維孝友之訓益深報本之思當必有魁梧傑出之人以爲文教先是又山靈之秀氣所鍾而亦卽帝君之仁澤所覆育於無已者也

由醒園右手而下卽團堆壩河也有文昌宮人呼爲下梓潼在縣北三十里

調元二月三日至團堆壩文昌宮觀劇見葉贊之天

相毛殿颺德純兩秀才携尊而至歡飲至暮

故友携尊枉駕過一龕同佛聽笙歌君能有酒謀諸

婦我喜無殺得刺婆蜀人謂鱸為刺婆魚古寺僧稀松葉少戲

場人散蔗皮多甘蔗冬窖春賣兒婦尤喜噉之戲場為甚多嚼其汁而棄其皮與渣焉

十年不到團堆壩白髮看看奈老何

又五里有寶豐寺有牛王會

又八里至南村東山有東嶽廟皆明初所建